

CONVENIO DE COLABORACIÓN ENTRE O CONCELLO DE CARBALLO E FUNDACIÓN LUIS CALVO SANZ PARA A REALIZACIÓN DO XXI CERTAME FOTOGRÁFICO XOSÉ MANUEL EIRÍS.

En Carballo a 5 de marzo de 2019

REÚNENSE

Dunha parte, D. Evencio Ferrero Rodríguez, Alcalde do Excmo. Concello de Carballo, actuando en nome e representación do Concello.

Doutra, Luciano Calvo Pumpido, como Presidente da Fundación Luis Calvo Sanz, con domicilio social en Estrada A Coruña-Fisterra, Km 34 do municipio de Carballo, C.I.F. A 15017205.

Ambas as partes teñen plena capacidade para levar adiante este convenio e,

EXPOÑEN

Que o Concello de Carballo ten entre as súas finalidades promover a cultura, a creación artística e a realización de actividades culturais, apoiando o papel doutros organismos e entidades na organización destas actividades e a celebración das mesmas en todo o municipio.

Que a Fundación Luis Calvo Sanz S.A. é unha entidade que colabora en diversos proxectos para a sociedade nos ámbitos cultural, científico, deportivo, social e económico.

Por isto, co obxecto de promover a cultura e a creación artística, enriquecer a oferta cultural de Carballo e apoiar o labor que a Fundación Luis Calvo Sanz ven desenvolvendo, e dado o interese común das partes asinantes, é polo que asinan o convenio de colaboración de acordo coas seguintes cláusulas:

CLÁUSULAS

PRIMEIRA. – Finalidade

A finalidade deste convenio é promover a cultura, contribuír á creación artística e fomentar a divulgación da fotografía, así como enriquecer a oferta cultural de Carballo establecendo unha colaboración entre o Concello de Carballo e a Fundación Luis Calvo Sanz colaboradora habitual en diversas actividades culturais tanto do Concello de Carballo como doutras entidades, coa realización do XXI Certame Fotográfico Xosé Manuel Eirís, concurso de fotografía de carácter anual organizado pola Concellaría de Cultura do Concello de Carballo.

SEGUNDA. – Obxecto

O presente convenio ten por obxecto regular a colaboración entre o Concello de Carballo e a Fundación Luis Calvo Sanz para a realización do XXI Certame Fotográfico Xosé Manuel Eirís.

O Certame Fotográfico Xosé Manuel Eirís é un concurso de fotografía que organiza a Concellaría de Cultura do Concello de Carballo con carácter anual e que

ten por obxecto contribuír á creación artística e a fomentar a divulgación da fotografía.

Poden participar neste concurso todas as persoas físicas que o soliciten e cumpran co establecido nas súas Bases aprobadas polo organismo correspondente. A dotación total dos premios é de 3.050 € distribuídos en 1.500 € o Primeiro premio, 750 € o Segundo premio, 500 € o Premio Especial Carballo, así como un importe total de 300 € en accésits. Unha vez feita a Convocatoria, recibidas as obras e realizado o fallo do xurado, realizarase un acto de entrega de premios e unha exposición coas obras gañadoras e unha selección de obras presentadas a dito Certame.

Esta colaboración entre o Concello de Carballo e a Fundación Luis Calvo Sanz regúlase nos termos e condicións que se establecen a continuación.

TERCEIRA.- Realización:

O Concello de Carballo realizará a convocatoria da XXI edición do Certame Fotográfico Xosé Manuel Eirís durante o ano 2019 para que os interesados presenten as súas obras.

Tal como se establece nas bases, aprobadas polo organismo correspondente, a composición do xurado contará coa presenza de persoas vinculadas ao eido da fotografía e da imaxe, dun representante das asociacións culturais de Carballo e un ou máis representantes do Concello de Carballo. Ao xurado correspóndelle deliberar, estimar e valorar os traballos presentados sendo o encargado de seleccionar as obras premiadas.

Unha vez coñecido o fallo do xurado, o Concello de Carballo organizará o acto de entrega de premios e unha exposición coas obras gañadoras e unha selección das obras presentadas, o lugar previsto é o Pazo da Cultura de Carballo.

CUARTA.- Obrigas de ambas partes:

Fundación Luis Calvo Sanz:

1. Asumirá o importe do Segundo premio do XXI Certame Fotográfico Xosé Manuel Eirís, que ascende á cantidade de 750 €, ingresando a devandita cantidade na conta bancaria designada polo Concello de Carballo.

Obrigas do Concello de Carballo:

1. Convocar a XXI edición do Certame Fotográfico Xosé Manuel Eirís durante o ano 2019, encargarse da difusión das bases.
2. Convocar ao xurado para realizar a reunión do fallo do devandito Certame.
3. Comunicar as obras gañadoras aos seus autores/as.
4. Organizar o acto de entrega de premios para o que se convocará a un representante da Fundación Luis Calvo Sanz.
5. Realizar unha exposición coas obras premiadas e unha selección das obras presentadas.
6. Asumir os gastos derivados da realización do XXI Certame Fotográfico Xosé Manuel Eirís, do acto de entrega de premios e exposición das obras.

Cada parte asumirá os gastos que se compromete a realizar baixo o presente Convenio.

QUINTA.- Difusión

Nas actividades derivadas do obxecto do convenio, tanto nos actos públicos coma no material de difusión que se realice, as partes comprométense a facer mención expresa da mutua colaboración.

O Concello de Carballo difundirá a información relativa a este Certame, indicando o patrocinio da Fundación Luis Calvo Sanz S.A. e insertando o seu

logotipo en dita publicidade. Con este fin esa información formará parte das bases e programa de man que deseñará e editará o Concello de Carballo.

Á súa vez a Fundación Luis Calvo Sanz poderá difundir esta actividade polos medios que considere oportunos e facer toda a publicidade necesaria indicando a organización do Concello de Carballo.

Así mesmo no lugar de celebración dos actos poderanse instalar infraestruturas coa imaxe do programa e logotipos dos organizadores e patrocinadores.

SEXTA.- As fotografías premiadas quedarán en propiedade do Concello de Carballo e os/as autores/as ceden a este os dereitos de comunicación pública de forma indefinida. Neste sentido, os/as autores/as renuncian, a favor do Concello de Carballo, a calquera tipo de remuneración polos seus dereitos de autoría.

A Fundación Luis Calvo Sanz poderá empregar as imaxes gañadoras en actividades sen fins comerciais nin económicos para a difusión da súa colaboración co Certame, facendo constar os/as autores/as das obras e que son as fotografías gañadoras do XXI Certame Fotográfico Xosé Manuel Eirís organizado polo Concello de Carballo.

SÉTIMA.- Vixencia

O presente convenio entra en vigor na data da súa sinatura e manterase en vigor ata o fin das actividades realizadas en relación co XXI Certame Fotográfico Xosé Manuel Eirís, durante o ano 2019.

OITAVA.- O incumprimento do estipulado no presente convenio será motivo de resolución inmediata do mesmo, con independencia das indemnizacións que por danos e perdas corresponda á parte cumpridora.


NOVENA.- En caso de suspensión por casos fortuítos ou de forza maior ambas as partes poderán acordar un cambio de data ou a súa suspensión definitiva.

DÉCIMA.- Natureza, resolución de conflitos e normativa aplicable.


O presente convenio ten natureza administrativa e queda excluído do ámbito de aplicación do texto refundido da Lei de Contratos do Sector Público, de conformidade co disposto no art. 4.1.d do Real decreto legislativo 3/2011, de 14 de novembro.

As discrepancias que xurdan pola súa aplicación serán resoltas, pola Alcaldía do Concello de Carballo, quedando as partes suxeitas á xurisdición contencioso-administrativa nos tribunais con xurisdición no municipio de Carballo para a resolución de calquera conflito que puidese xurdir na súa aplicación.

En proba de conformidade e aceptación, as partes arriba sinaladas, firman o presente acordo, por triplicado, quedando un exemplar en poder de cada unha das partes, no lugar e data indicados no encabezamento



Alcalde,
Sr. D. Evencio Ferrero Rodríguez



Presidente da Fundación Luis Calvo Sanz
Sr. D. Luciano Calvo Pumpido